

Ina pitschna dunna organisescha in grond festival

Atmosfera medievale carmala la glied en ustarias ed a festas

■ (anr/vi) **Veronica Cajochen è ina dunna pitschna. Sch'ins inscuntrass ella sin via, na schess ins betg ch'ella saja managera da cultura. Ella ha organisà il spectachel medieval a Lucerna da la fin d'emna passada cun pli che 12 000 visitaders.** Ins vegn bunamain sturn, sche *Veronica Cajochen-Caminada* dumbra si, tge ch'ella ha tut fatg. Cumenzà hai cun in'empredissadi da mecanista d'autos ch'ella ha smess curt avant la finiziun. Oz di ella: «Quai è stà plitost in toffa pubertara.»

Cun 18 onns è ella ida a Lucerna. Ella ha maridà baud, gè baud ses figl ed è era spartida baud. Ma quai n'ha betg tegnì enavos ella. Anzi, Cajochen ha prendì suenter la scola mercantila e la matura. Suenter ha ella emprendì da designera da moda ed acquistà la patenta d'ustiers.

Fatg tut

Quai n'è anc betg tut. Dapi in mez onn posseda ella il diplom per managera da cultura. Quest diplom ha ella fatg «sper» la lavur e l'educaziun da ses figl. Entant ch'ìls conscolars da Cajochen han stuì imprendier a temp cumplain per pudair far il diplom a la Scol'auta per art appligà, ha Cajochen profità da sias experientschas sin il sector cultural e sco dunna da fatschenta.

Cajochen n'ha numnadain betg sulet fatg scolas e diploms, mabain gia baud emprendì d'enconuscher la vita commerciala. In temp ha ella lavurà sco contabilista. Avant dusesch onns ha ella avert l'emprim «Hanf-shop» en la Svizra centrala. E pli ch'in onn ha ella manà il «Sedel», in center cultural, nua pli che tschient bands han lur tschalers d'emprova. Cajochen è stada documentalista e designera da web. Sin la remartga che quai saja fitg bia clamadas ed occupaziuns, manegia Cajochen sulet: «Jau hai



Far bogn sco las dunschalas ed ils chavaliers: Quai è stà pussaivel la fin d'emna passada a Lucerna.

anc laschà ora ina massa.» Ella fetschia adina puspè insatge nov.

Success cun festa medievale

Dapi diesch onns organisescha ella a Lucerna festas medievalas. «Jau sun stada l'emprima en Svizra che ha fatg ina tala festa», di ella. En Germania ed en l'Italia sajan tals events derasads. En Svizra dettia quai be ina pitschna scena. Perquai èn las festas apprezzadas tant pli.

«Ils emprims onns stuevan nus adina tarmetter davent var 300 persunas. I vegniva memia blera glied», raquinta Cajochen. Perquai hajan ins dischlocà la festa, l'emprim en il «Drei Linden Park» e pli tard en il center. Uss ha la festa lieu sin

pliras piazzas, en ustarias u en il museum istoric. Perfin il museum da traffic sa participescha.

Avant dus onns han ins dumbrà 10 000 visitaders al «Luzerner Mittelalter Spektakel». La fin d'emna passada hai dà 12 000 persunas. Ma Cajochen precisecha: Tar questa cifra stoppian ins quintar vitiers anc 30 pertschient, pertge ins dumbria sulet las persunas che pajan ina contribuziun voluntaria. I haja dentant anc blera glied che na paja nagut. En il decurs dals onns è il spectachel creschì ed è uss il terz-grond eveniment a Lucerna.

Far bogn sco pli baud

E tge vegn purschi? Tgi che vegn al specta-

chel po tadlar gruppas che sunan instrumens vegls. Ils stans porschan tschaveras da pli baud. «Tar nus na datti nagina coca-cola», declera l'organisatura. Ins vendia sulet bavrondas originalas: must, gervosa, vin da mel u aua da jarvas.

Al martgà medieval inscuntrin ins il fravi, in calligraf e po observar co ch'ìls mastergnants lavuran. Schizunt bogn pon ins far, exact sco pli da baud.

Ils uffants pon daventar chavaliers. L'emprim han els d'emprender en in curs las lavurs da miniers. Suenter obtegnan els la benedicziun cun la spada. Per creschids datti curs da scrimar u da traire cun artg. Tut quai è be ina pitschna part dal program.

Lavur gratuita

«L'aura ha tegnì tuts trais dis», di l'organisatura tut cuntenta. «Sulet la dumengia, curt avant la finiziun, hai cumenzà a plover.» Fin uss aveva Cajochen organisà tut en atgna reschia. Pir quest onn ha ella gè agid d'in team da sis persunas. Ella e ses team lavuran gratuit.

Persuenter è Cajochen daventada enconuscha: Sch'insatge fa ina festa medievale, porscha Cajochen support. Ella organisescha blers events per firmas e privats.

I n'è anc betg segir, sch'ì dat l'onn proxim puspè in spectachel a Lucerna. La pagina d'internet da l'unìun «Tempus et gaudium» vegn en mintga cas ad orientar, tge che curra e passa. La pagina porscha era infurmaziuns davart workshops e concerts medievals. La pagina d'internet ha Cajochen sa chapescha fatg sezza. Ella presidescha era l'unìun.

Reservar sis emnas ordavant

L'enviern maina Cajochen la «Taverne zur alten Münze» a Lucerna. Ensemen cun ses ami survescha ella en quest'ustaria spezialitads culinarias dal temp medievale. Mangià vegn ord stgadellas originalas, cun pusada da fier battì, sin maisas da lenn fatgas sez. En l'ustaria na datti nagina electricitad. La cameriera Veronica porta bellas rassas lungas, cun best e cun mongias da trumbetta ch'ella ha cusì sezza.

Schizunt las tualettas en la taverna sajan fatgas sco ils hislis da pli baud, di Cajochen.

Per pudair giudair ina tschaina en questa atmosfera medievale èsi dentant necessari da sa servir da metodos modernas. Ins sto telefonar e reservar plaz, il meglier gia sis emnas ordavant. Pertge las maisas en la taverna èn mintga saira occupadas.



Curt e bun

Num: Veronica Cajochen-Caminada
Naschida: ils 3 da matg 1969
Creschida si: a Laax
Clamada: managera da cultura
Hobis: cuser, computer, far da scribnaria
Musica: Loreena Mc Kennith e bler auter
Pajais preferì: Irlanda
Lectura: Ted Williams
Spaisa preferida: bulieus
Bavronda: aua minerala



«Duvielspack» è ina da las bleras gruppas che han procurà per saut e buna luna al festival.